

Cortina a cera pa Oslin Boekhoudt diabierna mainta

ORANJESTAD(AAN)-- Diabierna mainta Aruba a bin tende e noticia tristo cu Oslin "Chin" Boekhoudt a cera su wowonan pa semper. Aki dos luna e lo a celebra su di 82 año di edad, dia 17 di juni. Oslin a nace na Playa den e hanchi conoci como "Blauwesteeg, Hanchi Blauw" (panort y abao di Flor de Oriente) e bario cu abata conoci cu e nomber di "Gato Negro". E tempo ey Flor di Oriente no abata existi ainda.

BIOGRAFIA

Segun e biografia di Chin, el a bay scol na Aruba, Corsou y Hulanda. El a termina St. Dominicus College na 1949 y despues a bay studia pa mester di scol na "Bischoppelijke Kweekschool na St. Joseph straat 22, Den Bosch y a gradua na 1953.

Chin a cuminsa traha como mester di scol dia 12 di september 1953 na St. Martinusschool, Paradera, den 3de klas. Al a traha aki 5 año den diferente klas y despues a bay traha durante e periodo 1958/1959 na St. Dominicus College den 4de klas.

Mientras tanto el a gadua pa su hoofdakte A y B, ingles L.O. y Spañol L.O.

El a bira cabesante di St. Martinusschool na Paradera dia 1 di februari 1960 y asina tabata e prome laico cabesante di scol catolico na Aruba te cu 1970.

El a bira docente na La Salle College y a keda te cu 1976 y despues a bira Inspector di Enseñanza, cual trabao el a mantene te cu el a baha cu pensioen dial di october 1983. El a traha 30 año y un luna den enseñanza regular di nos isla.

E no a termina cu enseñanza aki pasobra despues el a bay traha na International Educational Institute di Jaap Beaujon y 11 año largo el a duna tayer di "T.A.A.T.", un metodo di comunicacion inter- y intrapersonal.

Oslina duna les tambe na Enseñanza pa Empleo te cu juni 2007 cu el a bira basta malo.

Oslin abata un deportista ferviente tambe cu a practica Softball y baseball, ping pong, futbol, judo y deporte acuatico di Ski, hasta a milita poco den mundo di boxeo.

E tabata un voluntario di diferente organizacion entre otro "De Trupialen", "Centro Apostolico Arubano", "Cursillo di Cristianad", "Teachers United", "Skoa", equiponan di Little league Pepsi Cola y Gibson. Ademas di a yuda e diferente organizacionnan aki, e tabata

tin un "Amor Grandi" y esey tabata "Teatro" cu el a dedica na dje sigur 55 año.

TEATRO

Oslin a haya e "pica di maribomba di teatro" tempo cu e tabata un welp bao direccion di Frère Johannes den e sala di teatro di Sociedad Bolivariana. Esaki tabata prome biaha cu el a subi escenario y no tabata den un obra teatral pero den un presentacion di ehercicio fisico.

Durante cu e tabata studia na Den Bosch, den e formacion cultural e alumnonan tabata bishita Teatro regularmente ora gruponan di Teatro profesional tabata presenta nan obranan.

Na final di e di 3 año di studio e alumnonan mester a presenta un obra di teatro y na 1952 Oslin a participa den un rol chikito. E amor pa teatro tabata latente ainda.

Den Centro Apostólico Arubiano desde 1956 tur año den tempo di Pasco Grandi y tin den tempo di Pasco di Nacemento e miembronan tabata presenta obra religioso pa recauda fondo pa haci nan obranan social - apostólico.

Aki Oslin a hunga e papel di "Trahador di Lago" den e obra "Golgotha" bao direccion di Pader Copray.

Anima y stimula pa Hubert (Lio) Booi y Frère Alexis (q.e.p.d.) Oslin a gusta teatro y a participa tur año



den e obranan cu "Centro Apostólico Arubiano" a presenta.

"Centro" tabata pasa rond presenta nan obra den tur Parokia cu tabata tin un sala y escenario adecuado. E salanan cu escenario hopi adecuado tabata San Nicolas, (Centro Santa Cecilia) tambe na Savaneta (cual sala t'ey ainda. Lo por restaur'e).

Santa Cruz tabatin e sala cu e mihor escenario despues di e escenario di Cas di Cultura.

Corda cu Cas di Cultura no tabata construí ainda e tempo ey..

E ultimo obra cu "Centro" a presenta, esta "Un soño di Pasco" ("Christmas Carol" di Charles Dickens), "Centro" a presentá tambe den "Cultureel Centrum Aruba" na año 1959 bao direccion di Sim Frank.

MASCARUBA.

Tres año despues dia 10 di april 1961 Mascaruba a wordo funda y Oslin tabata un di e

fundadornan.


Te cu su edad haltó e tabata actor- director - traductor - dramaturgo..

Oslin tabata "adjudicator" na Festival internacional na Des Moines, IOWA, USA, na 1990, na 1998 den Festival di FITA '98 y na 2005 "Colloquio = Adjudicator" na Festival Mundial di Teatro Amateur AITA/IATA na Monaco.

Den Mascaruba Oslin a actua den masha hopi obra, tabata



director di 35 obra y a dirigi 5 obra pa otro organisacion y instancia..Na 1996 Mascaraba a nombr'e miembro – Honorario. Su preparacion den teatro el



a haya cerca casi tur director profesional di teatro cu a yega di traha na Aruba e.o. Henk v. Ulsen, Yoeki Broedelet, Piet Eelvelt, Peter Holland, Piet y Elly Kamerman, Maxim Hamel, Dolf de Vries, Burny Every, Nicoline Nagtegaal. Na 1969 Oslin a core "stage" na Hulanda cerca grupo y directornan profesional di teatro, principalmente cerca e grupo di teatro na A'dam,, "Toneelgroep Centrum". El a core stage cerca Walter Kous, Peter Oosthoek, Han Bentz van de Berg, David MacDonald. El a atende ensayonan di Gerard Heystee y Piet Eelvelt.

El a atende grabamento di un produccion di K.R.O. bou direccion di Paul Paauwels. Den e numero "workshop" di teatro cu Oslin a participa ta resalta esunnan di Derek Walcott, Robert Finch, Agustín Nuñez, Prof. Mort Clark, Jorge Vilario, Burny Every, George Bruens, Myriam Réategui, Tomás Urtusástegui, Mick Casale. Di 19 - 27 di Juni 2003 Oslin a sigui un seminario internacional na Moscow, Rusia, encuanto "The Stanislavsky System Today, Practical Training for Actors and Directors of the Amateur Theatre" cu hopi éxito.

Su dirigentenan tabata Dr. M.Tchoumatchenko y O.Glushkov, M.A. Oslin tabata 35 año den directiva di Centro Cultural Aruba. E tabata na cuna di nacemento di e Festival Internacional Di Teatro di Aruba. (F.I.T.A.) y hopi año presidente di e comision organisador di FITA. Oslin tabata miembro di AITA/IATA di 1991 te cu 1995 representante di CARA. E particion di "Las Americas" den "CARA-CEARA-NARA -SARA" tabata specialmente trabou di Oslin. Oslin a wordo condecora na 1980 como Ridder in de order van Oranje Nassau, na 1986 el a bira Embahador di Amistad honorario di Ciudad Toyama, Hapon, y tambe miembro honorario di Centro Cultural Aruba y miembro honorario di Mascaraba y na 1987 el a bira miembro honorario di Teachers United. Oslin Julian Boekhoudt Sr. a bira tambe Ganador di "Premio Nacional di Teatro 2009". Mainta el a ricibi e premio di Prins Bernhard Cultuurfonds y anochi el a ricibi e Premio Nacional di Teatro 2009, relaciona cu Dia Internacional di Teatro.